



新編博物策會卷之九

陝西省

西安府人物

屏石戴璫著

劉敬論關中之地曰左有殽函右有隴蜀賈誼論關中之勝曰踐華為城因河為池蓋其地前臨沙苑後枕許岡控桃林之塞阻藍田之關誠蘇秦所謂天府之國東方朔所謂陸海之地也考其沿革即周之王畿漢之京兆宋之永興元之安西也人生其間尚氣槩先勇力然將相篤生項背相望衣冠文物何莫非先王之遺風哉請具陳之黃帝之時有倉頡觀鳥跡而制文字造書契以代結繩周之時壤駟赤長於詩書秦祖篤於守道皆

孔門之弟子也秦有王翦平楚之功與白起齊名漢
有魏尚有守雲中之功如李牧復出蘇武牧羊齧雪其
視李陵輩不啻糞土矣朱雲借劔攀檻其觀谷永輩不
啻狐鼠矣張安世以父任爲卽廉謹畏慎而官至富平
侯其子七葉皆爲侍中克昌厥後矣尹翁歸以高第守
扶風廉平守正而治爲三輔最其子三人皆爲郡守能
述其事矣肅玄成張山拊皆論於石渠閣者也曾恭李
育皆講於白虎觀者也朱博蕭育爲友而長安有蕭朱
結綬之歌然博之爲刺史決遣如神尤有大才也廉范
與慶鴻爲友而時人有管鮑慶廉之號然范之守雲中
匈奴遠避尤有大畧也王莽之亂蔣詡不出戶王卅不
就徵申屠劉避地河西孔奮避地姑臧如鳳凰翔千仞

之上高節美槩人不得而污之矣光武之興竇融從征
隗囂萬脩從平河北張純安集荆揚景丹從討王卽馬
援從征交趾如驂騑逸於千里之外豐功偉績人不得
而班之矣陳遵之投轄篤賓客之義而翟公之署門尤
爲美雲敞之收尸盡師生之情而摯恂之擇婿尤爲善
魏相諫北伐得宰相之體王嘉奏久任知閭閻之瘼馮
野王通詩馮浚通易馮立通春秋以兄弟而若此馮奉
世瞑目於地下矣耿弇平銅馬耿國絕單于耿恭敗匈
奴耿秉擊莎車以子孫而若此耿况含笑於九泉矣楊
政善說梁丘之易教授常數百人范升可謂有傳矣宋
登少傳歐陽之書教授數千人宋由可謂有子矣馮融
博通經籍著述甚富雖淹滯東觀不以爲辱賈逵兼書

經典論難甚正雖內備惟怪不以爲榮班彪著賦論九
篇班固著漢書一部父子之學何特出耶至於固之弟
超成投筆之功將畧有過人者楊震以清白楊秉楊賜
以剛正父子之行何非常耶至於彪之子脩悟曹娥之
碑明睿有絕人者郭伋爲漁陽守而道不拾遺第五倫
爲督錢掾而市無阿枉第五訪開倉賑飢劉寬蒲鞭示
辱皆入循吏之傳者也韓康賣藥辭幣梁鴻耕山自娛
皆登高士之錄者也馮衍爲曲陽令陳八事以爲規至
於顯志一賦肆而昌傅毅爲蘭臺令作七激以自賦至
於連珠二十篇宏而麗宋弘絕胡陽之婚宅心何忠厚
也杜篤作吳漢之誄爲文何清婉也杜林議郊祀之禮
悉權於義而不嫌其簡趙岐著軻書之序皆得其實而

不厭其詳蘇章劾故人之奸有不顧私恩之公也蘇不
韋悃仇家之塚有不共戴天之情也樂恢雖爲竇憲所
殺然諫北征之書欲爲國家垂不拔之基竇武雖爲王
甫所殺然誅宦官之謀欲爲朝廷立無疆之計秦彭以
禮訓人彷彿韓延壽之風張湛正色立朝庶幾汲長孺
之比三國之時杜畿守河東治爲天下最張旣令新豐
治爲三輔最馬超雖不克正而輔昭烈之出亦效寸勞
蘇則雖不克終而悲漢室之亡亦露微情西晉之時杜
預博學而撰左傳集解摯虞博學而撰昭穆十卷杜錫
善諫諍雖遭甑中之針而進諫益力王育少孤貧雖牧
里中之羊而好學益堅南北朝之時吉翰事宋武帝而
清謹吉士瞻事梁武帝而清約寇雋爲刺史而立序序

侯植爲刺史而平江陵常佐吉玢皆以孝聞然玢以十五歲救父其孝義出於真情尤人所難康絢馬樞皆以學鳴然樞以六歲通經其明慧出於天性尤世所罕常叡常正常放父子也而資性篤實楊拯楊椿楊津兄弟也而家世純厚常孝寬之守王壁百發百中智勇絕倫蘇綽之佐宇文有因有革規模合古隋之時常沈擊破突厥劉方討平交州史萬歲則破溪洞者也楊武通則討羗夷者也楊伯醜著易辭異先儒之旨而以義理自悟蘇威撰定樂志拂時人之說而以鍾律自任楊善會獨能抗賊常世康獨能薦賢唐之時劉弘基殷開山皆有攻城畧地之功劉文靜杜如晦皆有窺敵制勝之策李大亮秦涼州之進鷹蘇世長諫涇陽之獵兔侯君集雖不然而有平谷渾克高昌之功李夷簡雖無大建明而紀寇賊厚誅之語姚思廉撰梁陳書韋弘機上西征記張儉建平糴之法而兄文師太僕卿弟延師大將軍門並三戟李峴守無敵之節而兄峴御史大夫嶧戶部侍郎門列三戟田仁會敗薛延陀於河內其智勇何如也唐休璟破吐蕃於靈武其才猷何如也李玄通不屈於黑闥而甘於瀆腹韓偓不阿常貽範而甘於斷腕李迥秀至孝而有犬猶同乳之祥崔佑甫剛正而辨猶鼠同乳之異武后之亂于志寧韓瑗泣諫之矣事之不濟而以周易李于時李昭德之強訟高叡之死節嚴譏被來俊臣之誣蘇良嗣批僧懷義之頰常安石折二張之橫屹屹乎中流之砥柱也安史之亂龐堅程千里

已死戰之矣事之不濟而以臣叛君于時來瑱之殺賊
李嗣業之守城蘇源明之卻僞署韓洄之走江南郭子
儀之平河北昂昂乎列災之真金也韓休守正而玄宗
有吾瘠天下肥之說路嗣恭課最而玄宗有可嗣漢魯
恭之稱杜甫之詩涵渾汪洋乃詩人之聖賢李泌之謀
光明正大乃中興之豪傑有李勉而草創之朝廷爲之
尊有楊綰而侈靡之風俗爲之革王忠嗣控邊疆百里
張仁愿築受降三城以蘇瓌爲父而有子邇頴悟超凡
與張說齊名以嚴挺之爲父而有子武豪爽出類爲房
瑄推轂令狐彰脩貢獻之禮乃藩臣之恭順杜黃裳誅
劉闢之寇有宰相之識度韋見素在吏部銓敘平允韓
滉爲轉運使國計盈庾常袞立鄉校而閩人由之知學

李程中狀元而士流爲之推重韋夏卿韋正卿皆無忝
於賢良之舉杜牧杜凱皆無負乎進士之名徐申討李
希烈而奉天之幸馮河清發甲兵輸行在又何忠也賈
隱朴擊朱泚而梁州之幸常武委妻子奔行在又何誠
也白居易之作詩詞冠絕古今而其弟白敏中亦有可
取者楊於陵之限于制杜絕奸人而其子嗣復亦可稱者
柳公綽柳公權兄弟也而在朝咸有所益令狐楚令狐
綯父子也而居官咸著厥聲楊收號神童而曰發曰嚴
曰鉅曰鱗曰涉曰汪或爲學士或爲尚書文憲聚於一
門如此也柳仲郢號爲御史而曰璞曰珪曰璧曰珉不
奏祥瑞不度浮屠家法傳於三世如此也韋貫之嚴身
律下而子澳尹京兆豪右斂跡孫溫在翰林文學發身

至於其家之女子能續曹大家女訓何文物彬彬哉趙存約遇賊被害而長子隲廬墓十年不應徵召次子隱生子三人皆擢科第至於其家之奴客而能拒朱泚攻城何人才藹藹哉屈突通不顧其子而汗馬之勞屢著於開創之日常處厚善事其母而犯顏之諫恒切於多事之秋唐臨為萬泉丞縱囚來還育之以仁也嚴郢為京兆尹疾惡使畏正之以義也揚弘禮居司農楊弘武居西臺兄弟皆以稱職聞李道廣為平章李元紘為中書父子皆以清節著令狐德棻秘書有聲而其孫岍撰實錄裒詔策亦有功於史官杜希聲刺史有聲而其子佑撰次通典搜羅載籍大有功於來學孫思邈隱太白山而辭國子博士之召田遊巖隱箕山而辭崇文館學士之徵常況

隱王屋山雖授之諫議而不受吳筠隱嵩山雖召之間道而不留李朝隱罷斜封之官盧鈞除驛馬之弊于休烈機鑿精敏而子孫一為學士一為侍郎一為僕射咸有以揚休光常斌居喪哀毀而兄弟一為尚書一為將軍一為少師咸有以垂令譽許孟容責李昱之償 錢豪右大震常臯數王叔文之陰事元惡斯除寶易直則公潔而不引親黨杜審權則清重而不泄內言常叔夏通禮樂而朝廷禮制皆與討論于邵善屬文而朝廷制誥皆其脩撰常湊諫作金仙等觀直則直矣而祖叔諧與兄季武弟叔謙三人同時為郎中何榮如之常述撰武德以來國史工則工矣而弟曰道曰迪二人同時為禮官何清如之五代之時李憚論貢舉不作詩賦張保續

累使藩國不辱君命宋之時陶穀雖失節而有詩名雷
德驤雖挾私而有直聲崔翰征太原以忠勇許國韓丕
知河陽以冲澹律身李若拙尚氣有才而子繹作五知
先生傳楊克讓好學不倦而子希閔有三子進士第楊
礪舉進士第一人有孤清之節寇準一青幃二十年有
澶淵之功趙湘上疏十篇鑿鑿乎福民之良劑劉長孺
見囚百日磊磊乎守節之忠肝蔣偕屢平寇叛而知禦
邊之術者李周也崔嶧更定錢法而論孤立之弊者張
昇也侯可個儻有氣節而韓琦薦之爲知縣蘇昞學力
有進益而呂大忠薦之爲太常趙瞻論青苗而著史記
抵牾張舜民論新法而號浮休居士呂大忠知秦州有
聲呂大防知華州有仁心至於呂大鈞學於二程而
著鄉約呂大臨學於伊川而著克己銘兄弟以才學名
如此何文聲之盛也宋浞判梓州有器識宋沆爲轉運
有廉介至於宋澥居長安以歌咏自娛宋濤知襄城以
政績自效兄弟以才行聞如此何英雄之聚也李廌幼
孤能奮蘇軾奇之曰今之秦觀也張確死節不屈欽宗
悲之曰今之巡遠也游帥堆破吐蕃外患爲之不擾李
好義誅吳曦內寇爲之不熾逮至于元奉先陽奐作萬
言書作還山集謂之先生何忝蕭道壽劉德一以執杖
一以傭工謂之孝子何愧楊恭懿與許衡同召而請以
經義論策試士賀仁傑從世祖南攻而得錦袍玉帶致
政蕭夔讀書三十年博通群籍侯均積學四十年淹貫
百氏韓擇信道不惑世祖徵之不至同恕博學不淺仁

宗召之不起第五居仁帥蕭軒教授群生賀惟一師趙孟頫總裁三史至於我

朝張統勤學勵行而右左布政之擢姚哲才學卓異而有春坊贊善之用禮部尚書呂震戶部尚書李昶一有博古之功一有轉運之功山東布政張賢山西布政喬誠一有廉幹之德一有寬平之德李暹趙倫皆為戶部侍郎而刑部侍郎任勵皆有能聲也馬京康汝楫皆為刑部侍郎而兵部侍郎黑麟皆有政績也副都御史李濟歷官守法僉都御史段信為人廉謹高仕文從征交趾力戰而死卒追封建平伯王真從靖內離轉鬪而死卒追封金鄉侯曹端劉昂皆有聲於典藩之日雷亮蕭伯劉皆有名於僉臬之時林嵩為御史持法不撓張璉為通政恭勤不怠馬巨江學問老成官之翰林而不就張鵬德量寬厚官之藩臬而有光天順以後卓人異士相繼迭興吾未暇悉數之也

鳳翔府人物

岐周之地周之所興也鳳翔之名唐之所設也漢曰扶風魏曰岐陽此禹貢雍州之域天文井鬼之區其地隴關阻其西益門扼其南山如犬牙之險峻原如長蛇之鬱屈所謂五水之會三秦之一也民生其間雖喜射獵而多出名將且厚重質直無驕情之習縉紳之士皆尚儒雅者多矣先王之遺風豈以久而泯哉請具陳之周有周公旦制禮作樂而制越裳之貢有召公奭夾輔王室而作旅獒之篇并子乃伯益之後有養馬之能而孝

公使續嬴氏之祀三良乃子車氏之子為當時之良而
國人有黃鳥之賦若夫白起雖殘忍之人而亦智勇之
將也漢之時郭欽以司直之官廉介不污以王莽之亂
隱遁不出井丹五經皆通而有五經紛紛之號法真四
徵不屈而有玄德先生之號蜀有法正進奇策於昭烈
魏有魯豈之進讜言於曹爽以南北朝言之魯爽魯豈皆
為宋文太守魯豈悉達魯豈皆為梁陳刺史言行雖未
有可紀而兄弟亦各有所長矣唐之時竇軌討平世充
李高遷從下霍邑劉感不屈於薛仁果而其於殺身疾
風知勁草矣段秀實不臣於朱泚而輕於捐軀歲寒知
松栢矣王珪正色立朝屢著骨鯁之直和逢堯負鼎詣
闕欲獻鹽梅之忠李淳風明麻筭并占筮如神馬麟擊吐

藩武幹如虎竇威雖有奸讀書之癡而博覽亦可取者
楊炎雖有殺劉晏之惡其孝行亦可稱者逮至于宋張
載沉潛力索妙契疾書其頑砭愚擴聖賢未發之旨正
蒙理窟闡道學幾墜之其張戢為御史論王安石之亂
法而權奸不敢肆閭詢其契丹諳比方之情狀而夷人
不能欺元之時楊暉趙其水禱山以明母目一禱山以
愈母疾而啓塋之日有其蚍食終喪負土成墳之異我
朝之時甄儀李敬臣艾其以兩為臣卿一為布政而發身
之途有舉人人材才能其干異之異天順以後六才亦不
乏人吾未暇舉之也

漢中府人物

崖谷峻絕十里百折其其硯見於柳宗元也秦坤蜀良連

高夾深其書本於歐陽信也故以言其形勝之奇則東
接襄沔南通廣漢西連秦蜀之粟左通襄荊之財右
利則前控六路之師後之咽喉巴蜀之捍蔽也人生其
出秦隴之馬此誠成都之喉咽巴蜀之捍蔽也人生其
間風氣強梁多事畋獵而有踏石解纆之風然俗隨五
方而好義之士豈不足以揚休光於後世者哉請具陳
之漢有鄧先申晁錯之免有鄭子真卻王鳳之聘張騫
使月氏十三年可謂不命矣且張猛與周堪輔政天
下服其剛為石頭所害天下知其寃李邵知二使星向
益部可謂善天文矣其子固忤梁冀天下謂之名相孫
爨精經學天下謂之賢其子法為光祿大夫不阿權貴
錫光為交趾太守不附王莽楊王孫雖所治非其術而
裸葬反真主於儉約祝龜雖所事非其君而撰者皆舊傳
善於鋪敘晉之時有王遜以馬駒付官國爾忘家也有
張威以士兵逐寇公爾忘身也以南北朝之時言之垣
護之強果垣崇祖之幹畧皆有功於宋齊者也至於垣
榮祖彈雲中之鵠志氣不凡垣閔却齊主之婚器識有
在若夫垣閔守九真素有威信垣曇監羽林雅有學行
隋之人物亦有可言者矣李襲志不降蕭銑甘取陷城
之辱何妥上論蘇威寧就龍州之貶節義皆可稱也以
唐言之李孝儒封郡公辭歸不就崔觀辟參謀辭疾不
至此皆無意於進取者也至於權倖入蘇原明之群而
善善之長權臯慰安祿山之辭而惡惡之嚴若夫權德
輿為文章貫綜經術權璠為進士顯著休聲而宋之人

物亦有可言者矣雍冲以太學生欲斬元祐紛更之臣張珏以制置使就死於元人被執之日氣節亦有可取也元之時七歲能文而隱居有終焉之計三入中書而經綸有勿欺之節非李子孟乎我朝之時或以鄉貢而擢知州羗人畏服或以通經而擢鹽運國計充足非吳備梁春乎天順以後人才亦不絕吾未暇屢數之也

平涼府人物

水土雜於河西人煙接於北地此是郡疆域之僻也西陲實為要地山川最為秀拔此是郡形勝之奇也蓋禹貢雍州之域天文井鬼之區左控五原右帶蘭會黃流在其北崆峒阻其南誠所謂襟帶西涼咽喉靈武者也

考其風俗穴處者多將手者衆尚氣畧且善騎射然被文王之化而婚姻喪葬豈不井井然可觀者乎請申之漢之時梁統當更始之亂與竇融起兵保境梁松為少府之官與諸儒脩禮制儀梁竦以經籍自娛而三子皆膺茅土之封梁商以謙抑自持而一門皆與椒房之戚李恂持節布恩不負韓詩之學王符杜門著書自號潜夫之論皇甫規為中郎將討平先零皇甫嵩為北地太守討平黃巾以三國之時言之皇甫謐博綜典籍而有玄晏先生之號胡奮從征遼東而有夏陽子之封晉之時皇甫重為新平太守沉果有用張軌為涼州刺史威信有為南北朝之時鄧彥海博覽詩書而與崔宏參定朝儀胡國珎雅尚清儉而與崔光俱授帝經席法友刺豫

州以廉清稱席闡文刺雍州以才能稱韓茂討赫連功
不可及矣而子備爲行唐侯均襲安定公昭昭乎聲譽
之莫掩皇甫和明禮儀學不可及矣而弟亮爲行臺郎
子聿道爲比部郎綽綽乎幹局之可觀梁士彥梁睿有
平齊平王謙之功金祚有討楊紹先之績隋之時皇甫
績益平陳之策皇甫誕死王諒之亂牛弘有弟殺駕車
牛而不以爲意其篤於兄弟之義也如此梁彥光以父
用紫石英而忽然有得其深於父子之孝也如此至於
梁毗刺西寧而不受金官大理而不枉獄亦有可尚者
矣唐之時牛僧孺對賢良之策洋洋乎文理之兼優皇
甫鏞諫兄罇之言凜凜乎忠誠之懇到皇甫無逸聞并
州之變而卽號慟其得於過庭之訓者孰呂向遇遠方
之老而卽號慟其得於邂逅之遇者奇宋之時郭成郭
浩破金人於建炎之時吳玠吳玘破兀朮於和尚之原
曲玘破夏人於涇原郭執中破金人於成州郭許爲傳
致所害然終不受汚之言至今爲之出色也曲端雖爲
張浚所害然大敗婁宿之功當時爲之推重也劉惟輔
爲副總管殺金將黑鋒楊政爲安撫使敗金將兀朮向
寶發一矢以殪虎年十四而破敵真薛仁貴之比矣胡
順之械豪橫而不之容迺州官而不之拜宜范仲淹之
愛矣我

朝之時張諒任營繕司員外克勤所務懼布政司參議
懋著乃聲天順以後人才亦不絕吾未暇論之也

鞏昌府人物

論鞏昌之疆土接壤羌戎通道隴蜀雖近於僻考鞏昌之形勝背山面池襟帶秦隴則極其奇蓋其地西傾朱圉東邇梓潼卽戎羌之地而秦之隴西漢之天水東漢漢陽卽此地也人生其間雖高尚氣力以習獵爲生然習無澆浮多循古制者也不然何車鄰小戎之詩皆有格言可傳誦者乎請具陳之周有石作蜀爲孔門之弟子漢有紀信爲開國之忠臣漢之人物不止此耳李廣爲北地太守匈奴爲之遠遁趙充國爲車騎將軍西羌爲之夷滅都護西域段會宗也而諸夷爲之立祠從擊羌人龐德也而軍聲爲之大振任棠隱居教授太守龐參欲致之而竟不與之言但以一薤一盂示之其意有在也姜岐隱居守道太守橋玄欲致之而竟不之往雖

曰趣嫁其母督之其操益堅也楊阜趙昂皆破馬超於烽火擾攘之日隗囂趙壹皆嗜冒經書於兵燹雜亂之中三國之時閻溫雖爲馬超所仇然守死之節於道爲盡矣姜維雖爲鄧艾所降然伐魏之舉於義亦正矣晉之時朱冲以寬大化其鄉姚弋仲以忠義勉其子楊輔好易而有數百人來受業其行義何清脩也姜平子賦詩而丁字直不屈下其諷諫何委曲也南北朝之時焦度辱流攸之而有焦度樓之號尹正擒張纘而有新野侯之封趙知禮爲元締軍事又以書翰自娛趙文表世爲二千石又以脩謹自勵李叔仁破王超宗李弼破高權皆爲國戡禍亂者也趙貴破元顥趙昶破氏羌皆爲君除寇盜者也李穆從宇文撫關中謙謹而無滿溢趙彞從

宇文破洛陽深沉而有器局辛威有嚴明之畧權景宣有仁厚之心楊機有清白之操趙芬有決斷之智隋之時李景有平陳之功而為總管一方之千城也權武有平陳之功而為刺史一州之保障也李充擊突厥有折衝禦侮之畧姜暮化盜賊有道德齊禮之風唐之時姜晦令長安處事精明矣而平高昌封郡公者兄子確也尹思貞明春秋擢居高第矣而通百家拜學士者子情也李白才思飄逸寓情於詩酒之間李仲敏質性剴峭獻忠於奏疏之語李揆門地固高而尤以文章為時羽儀李讓夷爵位雖顯而尤以儉約為世谷美趙昌都護安南夷落嚮化趙憬見知李泌志行超凡五代之時王仁裕著紫泥文采卓卓也唐景思戍淮上功烈鬼鬼也

迨至于宋尹崇珂為刺史有善政太祖命李穆撰文以頌之李士衡為三司使有異政真宗作寬財論以賜之董湜好教子之樂而子綬緝相繼登第教之以文而述之以文也王君萬解河州之圍而子賜贍屢立戰功師之以武而述之以武也劉仲武敗吐蕃而贈少保之功勒之鼎彝矣趙隆平夏州而賜旌忠之額榮於華衮矣劉錡敗金人於順昌而武穆之謚當其實張俊敗金人於太原而鐵山之號揚其休王德張威皆與金人戰一則百戰未嘗敗北一則戰酣愈奮精采犬羊之醜翕然避迹三舍牛皓張子蓋皆與金人戰一則死之於瓦吾谷一則擊之於海州惟惺之籌足以折衝千里曹友聞之節如松栢見於控制太原之時丁熿之才如霹靂見

於安撫利州之日逮至于元李庭玉每戰而有功以老而乞歸汪世顯汪惟正祖與孫雖可議者多而亦有一節可取楊大淵楊文安父與子雖可疵者多而亦有一藝可用以我

朝言之門克新為訓導生徒有就而有春坊之擢曹銘為給事才名夙著而有都憲之擢汪壽守備涼州謙恭下士儒將之風度幾近之楊仕敏知太平府平易近民循吏之政殆足當之天順以後人才亦有之矣吾未暇數之也

臨洮府人物

考河隴之故地乃嬴秦之舊封其民則徙關東之下平其境則接巴嶺之襟裔臯蘭峙其南黃河經其北其山峻聳其勢平夷比本西羌之地秦為隴西宋為武始隋

為金城者也人生其間雖好勇喜獵然民俗質朴而人才有可言者矣請申之漢之時辛武賢為酒泉太守能助成趙充國之功其謀畧有可尚也辛慶忌為車騎將軍能力救朱雲之死其忠節有可褒也若夫辛勉卻劉聰之餽辛謐卻冉閔之官辛恭靖抗姚興之難則皆晉之時也劉雄為宇文泰所信辛昂為尉遲迥所德辛德源為隋高祖所妬則皆周之時也魏之時辛慶之宗欽皆有儒者之風李禮成梁覽皆有行兵之功以隋言之李安以戰功陞柱國王傑以戰功封郡公辛彥之貢祭祀之物心存忠愛也辛公義抹霖雨之灾心存誠敬也李襲志不肯為尉陀尊王之經也薛舉自立為霸王濟世之權也逮至于唐李襲譽以廉平聞辛雲京以勇力

著以渾釋之爲父而有征朔方之功以渾瑊爲子而有復西京之功宋之時王淵有平叛寇之績雖爲苗劉所害而功業顯矣高子孺有知蘭州之名雖爲金人所殺而心事明矣若夫馬慶祥包長壽皆守死於金之時趙昌祈望芳皆有功於元之時以我朝言之石執中爲主事斷獄平允而有左布政之擢趙安爲指揮屢立戰功而有會川伯之封天順以後人才亦不絕吾未得悉數之也

慶陽府人物

張載記大順城曰城高如山池深如泉何山川之固也章叅記安化樓曰民淳不爭士慤有文何風俗之美也以其沿革言之禹貢雍州之域天文井鬼之星周爲不

窰所居之地秦爲義渠所居之國其名秦曰北地隋曰弘化曰安化者唐也曰環慶者宋也人生其間多穴處尚耕獵然先王興王之地流風漸被豈無綽綽奇才可以鳴國家之盛者哉請具陳之上古之時有岐伯而著素問難經之書周之時有不窰而啓公劉古公之業若夫公孫昆邪有擊吳楚之功公孫賀有征匈奴之功至於傅介子破樓蘭并延壽破郅支梁懂破烏桓皆兩漢之人才也傅嘏尹河南有聲傅咸爲司隸有聲至於傅玄劾權貴傅祗治水利傅弘之戰青泥皆魏晉之人才也宋之時王庶劾秦檜而至於道死謚之敏節宜矣若夫李彥仙敗金兵而至於戰歿謚之忠威宜矣若夫張吉以一烽卒而以忠義勉人以死節自奮尤爲人所難

也元之時有朶兒赤注尚書而有儒者多嘉言之贊墾
民田而有雲南廉訪使之擢逮至我
朝史仲成爲御史能持憲綱孔文英爲御史能清軍政
党理爲太僕少卿以經術飾吏治張驥爲大理少卿以
才畧平浙寇若天張清之歷官有聲又有可言者矣天
順以後人才亦不乏吾未得悉數也

延安府人物

疆理於往古者則禹貢雍州之域天文井鬼之星爲可
稽沿革於後世者則春秋白翟之國後魏統萬之鎮爲
有合其名則秦爲上郡魏爲金明乃三水之要會五路
之襟喉固邊圉之郡實爲形勝之地方考其風俗雖尚
鬼神事武力然不崇侈靡頗習程法而人材亦有可言者

也請具陳之後周有秦族有哀毀過禮之孝唐有張平
高有從征太原之功迨至于宋李繼周王文郁皆有破
西夏之勲李翼朱昭皆有死金兵之節楊偕著兵書固
矣而廢郭后之爭真爲忠朴李浩著安邊策固矣而破
智高之功尤有謀畧劉懷忠與夏寇戰死而子紹能四
十七年守邊有忠勇第一之褒有光於前矣李永奇爲
金人走死而子顯忠十七歲行兵有真關西將軍之號
善繼其志矣以劉延慶爲父從征西伐有功矣而討河
北賊有子劉光世焉以韓世忠爲父大破兀朮有功矣
而著水心鏡有子彥直焉張岳巡麟府路諭夏將於帳
中張宗頰遷崇信軍敗劉豫於泗上高永能入羅兀解
元討苗劉楊畋討平徭賊折可適經畧鄜延凡此皆宋

之人才也元之時何從義事袒父母以孝聞劉思敬事繼母以孝著王思聰禱天以愈父疾王士弘求醫以治父疾袁榮張允恭皆居顯官張閏趙漑皆近儒術我朝言之郭末道有學行而官至尚書王思有才行而官至叅政宋詡爲應天尹歷官有声丘野爲監察御史激揚得體湖廣副使高懷敬起身人才而有能名四川副使張綱起身國子而有勤名天順以後人才亦不乏吾未得而枚數之也

寧夏衛人物

禹貢雍州之域天文井鬼之星此其疆域之異也春秋羗戎所都西晉赫連所都此其沿革之異也其地黃河遶其東賀蘭蒼其西豈非邊陲之極地形勝之要衝乎考其風俗雖信機鬼尚詛覩敢戰鬪然自我

朝未徙民於陝西之先居民不雜五方之人而人才有可言者矣請具陳之漢有傳燮有諒直之名晉有傅亮有開創之績傳昭仕梁而博極古今稱爲學府傅縡仕陳而專掌詔誥號爲能文唐之時韓游瓌敗安祿山之衆楊懷賓斬李懷光之黨康日知敗李惟岳其功偉矣而子志睦承訓一封郡公一封郡男非以能繼志耶戴休頹敗朱泚其功卓矣而弟休瓚休晏一封郡王一封郡公非以其能追美耶至於史敬奉出奇繞後可謂智矣走逐奔馬可謂勇矣以宋言之周美有功於幸澶淵之時幹道冲有功於譯論語之日逮至于元李植從伐金李恒從取宋以高智耀爲父而有儒術補治道之奏

以高爵爲子而能稱浙東廉訪使之職至於日生吉爲御史大夫克持風裁爲江州守沒身王事此皆見於元者也我

朝人才雖不多見然徐琦以邊人登進士之榜以書生掌兵部之權非一鄉之卓卓者乎天順以後人才亦不乏人吾未暇論之也

北州衛

岷州衛

河州衛

靖虜衛

文縣千戶所人物

四衛雍州之域文縣梁州之境此其疆域雖定於古十室必有忠信豪傑亦能自興此其人才可證諸今蓋兆州本秦漢諸戎之地西控番戎東蔽湟隴岷州本秦漢臨兆之邑東連熙鞏西並洮疊至於河州靖虜本皆秦

漢隴西之郡一則東統洮河西峙積石一則南面烏蘭北背祖厲右夫文縣本春秋氏羌而漢西南夷也考其風俗雖皆勁悍而駁雜然鍾靈萃秀之士亦間見層出以垂芳於一載豈可謂秦無人哉請具陳之唐有李晟破朱泚功烈著於社稷有李愬擒吳元濟威聲震於邊陲以父子而若此不亦難哉此洮州之人物也宋有馬瑊守咸淳雖元將招之不從而其於殺身有馬瑊知欽州雖元將招之不從而終於斷首以兄弟而若此不亦奇哉此岷州之人物也以河州人物言之有念賢者卻相術之非習勤學之事仕求熙之爵受郡公之爵以靖虜人物言之魏有張繡殺麴勝以報祖之仇宋有程俊捐家財以贖母之生至於張覺民第進士於元祐之朝

號草堂於歌詩之日此又文縣之人物也我朝人物雖不可考然

聖明御極仁漸義摩將必有繼二李之功勳追二馬之忠義者矣

陝西四行都司人物

考是邦之疆域古爲月支而爲張掖武威酒泉西平五郡者漢也魏置并州而爲前涼後涼西涼北涼五國者晉也考是邦之形勝環以祁連合黎之山而峙於左者紅崖也又以居延鮮卑之水而瀕於右者青海也昔人謂是邦乃羌戎通驛之路三陝重圍之處信其然也生是地者雖壯猛習武事穴居野處崇尚釋教然自張氏以來民俗質朴慷慨有華風豈可以戎域小視之哉請

具陳之漢之時以金日磾爲兄著忠勳之節矣而二子亦能繼先志爲昭帝侍中焉以金倫爲弟具惇篤之操矣而四子亦能追先美爲元帝侍中焉張奐舉賢良而爲武威太守大著威化蓋勳舉孝廉而爲漢陽太守存活飢民至於段熲爲司隸校尉與皇甫規並顯名焉三國之時有栾布之節者龐涓也有良平之智者賈詡也晉之時賈疋有志節匡復晉室雖爲賊所殺而忠孝之節全矣索靖善草書馳名海內雖爲賊所害而五龍之號著矣祁嘉博通經傳而受業者二千餘人宋纖隱居九泉而受業者三千餘人至於索綝見誇於父索靖蘊逸群之量也見害於漢劉聰罄匪躬之節也南北朝之時亦有可言者賈彞年十歲而能訟父寃卒爲尚書左

丞不尸位矣劉延明年十四而能就博士卒爲儒林祭酒克堪任矣宋繇極意爲學封清河公固矣其孫游道有討惡之名豈愧乃祖耶段榮專意星象封姑臧侯固矣其子段韶有領兵之才豈愧乃父耶源賀爲征西將軍而上兵機十二陣固非洞識韜畧者不能也源思禮爲侍御中散而上事宜三十餘條非通達政理者不能也段榮專意星象而識人事之讖段韶入參帷幄而有望重之尊賓友宴飲必授執爵之人侯景大逆反得行觴之救非陰鏗乎陰壽代揔戎事而裁決甚平陰世師拜張掖守爲戎狄所憚從唐李靖討吐谷之功副侯君集建高昌之績非薛萬鈞乎萬淑軍功之顯有國公之封萬備廬墓之孝有詔表之美趙武孟感毋言而爲御史

其子彥明風骨秀爽亦登進士也烏承玘負勇決而爲平章其兄承恩塹原累石爲殿中監也至於烏重胤爲司馬節度使亦有令名矣李抱玉沉毅有謀觀其言耻與祿山共事所見者大李抱真深慮有斷觀籍丁能破朱滔之亂其功不小至於段平仲以進士拜御史亦著顯聲矣博學宏辭居學士之官下筆草詔歷僕射之任此又五季之李琪也以元言之荷戈之夫多嫉儒吏常情也乃有武人劉容與許衡游則其好學之功可知矣披甲之士多喜征伐流弊也乃有武人昂吉兒疏諫用兵則其經國之謀可知矣以至余闕登進士守安慶有保障之才提孤軍抗群盜盡捐軀之節即唐之張巡宋之文天祥也逮至我

朝吳允誠立戰功而封恭順伯則永樂之瓜牙也吳管者
立戰功而封廣義伯則洪熙之心腹也吳克忠爲太保死
于陣而謚壯勇吳克勤爲都督死于陣而謚僖敏有兄有
弟如此允誠可謂有後矣天順以後人才亦有可言者吾
未暇論也

新編博物策會卷之九終

新編博物策會卷之十

浙江省上

屏石戴璟著

杭州府人物

讀秦觀雪齋之記而知是郡外帶江海之險內抱湖山
之盛讀葛澧帝都之賦而知是郡據東南之都會號繁
盛之樂土蓋龍山據其首西湖蟠其腹天竺聳其胷東
山卧其背誠所謂山川之秀麗井邑之浩穰者也以其
名考之或曰武林或曰臨安而杭州之名則始于隋也
人生其間雖尚侈靡務工巧然人性敏慧尚禮厚龐人
才之出豈不亘古今而卓異者哉請具陳之三代人物
不可考矣其在於漢若張儼之開園而享一時之樂孫

鍾之種瓜而啓四世之貴其在于吳則有凌統拜偏將軍而繼乃父之志全琮爲東安太守而著國士之風郭成本泛五湖者也而享茅土之封其節義有足褒也丁譔本起行伍者也而來顧邵之薦其謀畧有足多也以晉人物言之楮陶作鷗鳥之賦穎悟絕倫矣故張華謂東南之寶而贊之深也郭文拔猛獸之骨驍勇出衆矣故王導有西園之迎而待之異也至於以范平爲父而以政事顯以范奭爲子而以文學鳴南北之時卜天與吳喜皆仕于宋而天與之拒劉劭尤忠臣之報國也朱謙之范述曾皆仕于梁而朱謙之殺幼方尤孝子之復讐也以松節讀書而作黃雀之賦顧愷也徵辟豈得而屈之耶以園蔬爲業而渡涉溝之盜范元琰也召命豈

得而招之耶戚衮講經領答如流而有禮記義可展誦也顧越避難辭爵如脫而有毛詩疏可潛味也監二郡於亂離之間而封永成侯非杜稜乎識文帝於草莽之中而封臨安侯非駱文牙乎至於杜之偉仕梁爲中書仕陳爲鴻臚節義雖不足觀而文辭則有可取矣以隋言之陸知命任御史而整肅百僚許善心任禮部而讀書萬卷顧彪著古文尚書義疏爲秘書學士稱其職矣魯仲達著毛詩章句義疏爲國子助教當其才矣逮至于唐褚遂良當武后之立扣閣力爭卒死於邊而不悔真魏徵之比也許遠遭安史之亂悉力支吾其死於賊而不攝直張巡之流也異龍出湖讀書不聞褚無量也而能定南郊之禮烏鵲來巢行孝所致章成緬也而遂

擅孝標之名凌準以謀畫佐元戎而朝中為之倚賴錢
鏐以鄉兵破巨寇而境內為之差安破黃巢者吳公約
也拒董昌者馬綽也杜建徽單衣入陣屢立大功而威
烈之謚當時榮之羅隱請討朱温最工詩句而甲乙之
集後世欽之逮於五代薛温之衛廢主忠厚之至也而
謚為正顯曹圭之守嘉禾膽氣之壯也而方之晏嬰以
宋時言之錢惟演少有俊才而族子錢易明敏縱逸登
進士甲科宜也至於其族孫曰彥遠曰明遠其曾孫曰
藻曰勰皆中賢良方正之科其家教傳授必不苟也謝
濤少有文行而子絳脩潔醞籍舉進士甲科宜也至於
長曰景初次曰景温季曰景平皆長文學政事之才其
家學唱和必有受也楊大雅十歲作雪賦而有歐陽修

為之婿唐肅七歲誦五經而有唐詢為之子張九成廷
試第一而極詆權姦樊光遠省試第一而極論時弊獻
汴都賦辭調無比周邦彥也佐錢王俶戰陣有功孫承
祐也孫贇與蔡京不協而不從張邦昌者唐恪也凌景
夏與秦檜不合而欲斬韓侂胄者趙汝讜也沈邁舉進
士第二沈晦舉進士第一而文章聚於一家也虞策以
官居吏部虞奕以官居戶部而簪纓聚於一姓也何鑄
救岳飛而貶資政其操守端矣趙汝談從朱熹而訂疑
義其趨向正矣使金而自篆九字授其友滕茂實也為
相而御製四字授其家錢端禮也儂智高之寇亂元絳
供軍餉為有功錢俶之反側崔仁冀勸來朝為有力李
用和以椒房之親而小心靜默畏而不驕也李宗勉以

台輔之位而家若貧儒富而不矜也鎮撫西夏則有若
陸誼賑濟毗陵則有若黃黼盛度知樞密而留書不去
手何力學之篤也林逋隱西湖而詩文不絕口何操履
之方也以強至爲父而有子淵明爲學士以才畧聞於
上以吳師禮爲弟而有兄師仁爲博士以學問顯于時
洪咨夔忠於諫而有六條之陳以道事君也卽簡恬於
進而無一人之薦以誠感上也葉時操履端疑而善朱
晦公文康之謚何愧哉葉李剛直不阿而攻賈似道文
簡之謚何忝哉以元人物言之楊載之文以才氣爲主
而以漢魏爲之宗吳衍之詩以清麗爲主而以李賀爲
之宗若夫撰尚書要略九歌譜說又衍之所獨得也然
古之流寓於此者晉有于寶搜神記悉思神之情唐有

裴覺爲刺史得義方之訓元則有鮮于樞以能書聞而
趙孟頫爲之推重張翥以能詩聞而仇遠先生爲之淵
源貫雲石以武人而折節讀書卒爲侍讀學士焉鄧文

原以文臣而博學強記卒爲侍講學士焉以我

朝言之官刑部而蒞政嚴明胡禎也官兵部而才識明
敏方賓也柴車爲大司馬而正色率下制勅褒之于敬
爲布政使而才能著稱士林推之王洪蔣驥均之爲行
人以清謹著而洪之三典文衡著毅齋集其造詣尤深
也沈升孫子良均之爲庶吉士以學問鳴而子良之與
修大典著螺城集其學力尤奧也瞿佑自教諭而官長
史有該博之名鄒濟自訓導而官詹事有和易之德姚
肇以孝廉而參大藩其論諫切時弊也吳登以學文而

官黃門其建白中君心也至於徐珂受委托於南京蔣
暉工書法於翰林又皆粲然可觀者天順以後人才車
載不絕吾未得而悉數之也

嘉興府人物

考嘉興之地其疆域在揚其分野在斗考嘉興之名在
周爲樵李在宋爲嘉禾說者謂大海環其東南震澤匯
其西北右蘇左杭襟溪帶湖山澤之介魚鹽之饒誠全
吳之腴壤而江東之都會也考其風俗雖信巫鬼多牒
訐然英賢迭出先後相望豈不可與蘇杭等哉請具陳
之三代以前人物不可考矣漢之時則有嚴助以賢良
拜中大夫而守會稽觀其作賦頌馳名於馬朔爭雉之
後朱買臣以薦舉拜中大夫而守會稽考其破東越騰

聲於衛霍出師之先至於張武痛父殺而持劍哭泣遭
毋喪而過毀絕命可謂之孝子矣晉則有韓績而少好
文學天子不得臣陳則有顧野王而幼能屬文當世無
與比逮至於唐則有陸敦信陸齊望陸偁皆以政事重
於廷而偁之尉溧陽民懷其惠世享其祠真男子事也
有陸贄陸扆皆以文學重於世而贄之作奏議百篇論
諫一本仁義尤名儒筆也徐岱辨論明銳而復禮鄉之
號則李栖筠有以彰之也顧况詩文雅麗而居大不易
之嘲則白居易有以表之也五代之時得一高彥焉事
吳越十年有征伐之勲爲刺史兩郡有寬簡之政宋之
人物不可以一言盡矣謝炎與盧稹齊名其爲文可觀
也且知華容公安二縣非學而優則仕乎聞人宏與陳

了翁同遊其高誼可慕也且著經史旁通等書非仕而優則學乎呂諤呂詢呂評以兄弟登進士而有名於兩浙陳之綱陳之純陳之經以兄弟登進士而有聲於四方魯昌言註杜詩十八卷能博學矣而魯昌言魯昌及其子可封可宗可簡皆以進士世其家燁燁科第光于一門如此也趙孟堅爲太守數年有異政矣而趙與翊趙與橡及其族崇恆崇愈崇昔崇侑皆以進士同其科濟濟豪傑聚於一榜如此也知山陰而不行新法陳舜俞也其登制科第一不負所舉知江寧而善能撫字莫光朝也其詩追配唐人不愧所擬蔡開蔡闢徐龜年徐逢年皆以兄弟登進士而龜年之爲知縣而賑恤爲御史而文効吾尤敬之也郭瑗郭三益莫抃莫澤皆父子登進

士而抃之判常州而振起守臨江而循良吾尤嘉之也捕私茶宜進秩矣而錢文爲之力辭破囚械若縱罪矣而沈木因之制勝著九山集者呂重庚也著東園叢說者李如箎也陳垣歷三部尚書而著讀鑑隨筆之書其子鑄亦登廷試蓋餘慶也輔廣著五經注釋而師事文公之門其學者稱爲傳貽先生蓋確論也歷官州縣政有能績趙汝能也歷官臺諫政有嘉聲江珪也遷左庶子而屢進讜言非婁機乎爲御史而屢陳公論非沈炎乎王用亨作二記於座右而鄉隣之登仕籍者多出其門成已而成物也常楙陳天變於上前而廟堂之議國政者多拂其意至大而至剛也以元言之吳森建義塾而廉訪使表其門曰義士潘應定廬墓側而左丞書其

門曰雙楨舉進士而有養蒙集張伯淳也首鄉薦而有脩辭藁俞鎮也至於戚敬之於毋廬墓以居張九齡之逸駕也刻像以事丁蘭之後塵也逮至我

朝著大易傳義者鮑恂也徵爲學士而辭歸是其重道義而不計乎功名也著清江文集者貝瓊也徵脩元史而成編是其善筆削而不局於口耳也著牧民心鑑童子習二書則有如朱逢吉著蒞政戒銘四十二篇則有若殷近仁以秀才擢僉都程本立也以賢良擢按察沈兼善也鄭楚瞻陳俊民皆以學行而歷官其後或佐外藩或副內臺綽綽乎有餘才也徐子良朱傑皆以監生而歷官其後或爲大叅或爲通政赫赫乎有令譽也崔永之尋毋而有崔孝子之號姚文之守郡而有廉謹自持之名天順以後人才彙征不絕吾木得而悉數之也

湖州府人物

江表大郡吳興爲一顧况記也江外饒佳郡吳興天下稀司馬光詩也蓋其地乃揚州之疆域斗牛之分野夏謂之防風楚謂之荻城或曰吳興或曰雪川而湖州之名始于隋也以形勝言之蒼峰北峙群山西迤山澤所通舟車所會雄於楚越誠南國之奧五湖之表也迹其土風淳厚習俗歸美士有遺韻之續張方平言之家有詩書之聲趙孟頫言之然則東南儒風之盛孰謂不自湖學始耶請具陳之三代以前人物未之聞也漢之時則有丘勝以公卿居於鄉邑見幾之智以盡施延以太尉讒於邪佞殺身之仁以成沈瑜居喪過禮度而有終

成奇器之譽費沈治邑多善政而有蝗不入境之祥三國之時朱治隨孫堅征伐而封毘陵侯其子才精敏善射可謂能襲其芳也朱然乃呂蒙薦舉而封永安侯其子績膽力過人可謂能述其事也吳粲有救軍士之恩王談有復父讐之志晉之時丘昂織畚自給家貧好學其弟曰夷曰矩孝友並著三丘之號不誣也潘綜迎賊扣頭請救父命其父純得免橫禍純孝之號不過也沈勁守洛陽而爲慕容恪所害守死之善也施彬侯中編而有子平爲尚書積善之報也南北朝之時則有沈田子據青泥之地破姚泓之衆沈懷遠沈懷文兄弟也而各有文集沈道虔沈慧鋒父子也而皆辭徵辟世爲將帥而折節好學沈演之也不事左右而坐清獲罪沈嶺之也沈憲爲令甚著政績太守褚淵稱之曰方員可施非虛言也丘寂之爲西曹待旨開門刺史王或稱之曰郅君復出非虛言也吳達燒磚爲業而好讀書然以暮年葬十三棺其高誼可以激頑也沈麟士織簾爲業而好讀書然撰要畧數十卷其博學可以範人也此皆劉宋之人物如此也丘靈鞠爲祭酒而不願數遷其子遲少能屬文漸染之者熟矣丘冠先使蠕蠕而不肯拜屈其子雄不受錢布哀痛之者深矣此又事于齊者然也以梁之人物言之著晉書及文集數百卷沈約也著三禮義毛詩音等書沈重也吳均撰春秋及註東漢書時謂之吳均體沈文阿撰儀禮八十條及春秋等義疏時謂之習父業沈崇僚居喪過禮而梁武帝勉其釋

服太史叔明兼通孝經而邵陵王聽其講說沈浚值侯景之亂責以大義而徑去不顧沈炯值侯景之召援以官軍而辭疾不赴沈瑀以性剛直於上有忤而在道被殺何不幸至此也沈續以父中傷累訟不白而布衣終身何至孝如此也以陳之人物言之胡頴沈恪皆有功於興兵之初陳仲舉沈不害皆進忠於建國之後孝行著聞錢道戢也而以功封侯輕財尚氣章昭達也而以功封公沈洙以博學聞而官左丞沈君理以幹理聞而官僕射以言乎隋姚察精於史學而有子思廉能繼其業吳嶠精於天文而有徒袁天綱能紹其傳至於有沈光者登衝梯之端短兵相接何其勇也乘江都之難戰死不悔何其忠也逮至於唐錢九隴有討黑闥之功沈伯

儀有定郊丘之議陸龜蒙嗜茶而立江湖散人之號錢起善詩而與大曆十才子之列孟郊之才天才也而張籍爲之定貞曜之謚沈景筠之孝真孝也而賀知章爲之撰孝德之傳徐昉有才名而三世登侍從包融有科名而兩世顯科目沈傳師文藝第一而官吏部有公道沈韜文謀略無雙而領鄉郡有清名若夫以宋之人物言之葉參葉清臣父子登進士而參之卓然自立尤爲可尚吳可幾吳知幾兄弟登進士而知幾之號爲孝子尤爲足誇盧革爲轉運而神宗稱之曰革廉退宜與嘉郡且有秉爲之子乞解官終養焉盧知原爲轉運而徽宗勉之曰卿在蜀功效甚休且有法原爲之弟爲宣撫有名焉劉壽著南山集而黃庭堅稱之謂羊欣復生也

沈復著四益齋集而真德秀序之謂其得大臣體也王
安石欲薦俞瀛而瀛方辭之然與趙抃相得深也章惇欲
薦朱服而服舉劾之然與蘇軾相交素也方秦檜之謀
殺岳飛也史棋孫鞠之曰誣人以求榮吾不忍也遂焚
其書可謂不畏強禦矣方蔡京之謀陷章絪也沈疇鞠
之曰殺人以苟位吾不屑也遂反其獄可謂不附權姦
矣長樂府者張先也而張三影之號播於天下通天文
者沈括也而使契丹之書傳於後世賈安宅爲大觀狀
元而屢司文柄得實材之用莫濛兩魁法科而出使金
酋得行人之體論新法者劉誼辨黨人者劉珪四百餘
奏辭皆剴切沈與求之爲中丞也論疏切直三黜不變
倪思之爲侍郎也葛邲在言路而論事皆中時弊謚之
文定宜矣李彥穎參政事而論事披露忠董誥之忠文
宜矣芮晬與弟暉力學而有二芮之號錢選與馮應齊
名而有二絕之號爲宰相而清約自持者施鉅也而趙
彥博以才能顯知臨安而所至成績周諮也而趙與黨
以才猷著著易書春秋傳者葉夢得也至於魯伯能則
文集三百卷以翰墨自娛馬撰小傳六卷者沈該也至
於沈瑄則著南歸二錄以忠憤自據馬游汶嫉賈似道
而不與之會直固直矣且不仕乎元尤足以扶植綱常
也徐俊惡賈似道而請肆之朝剛固剛矣且不仕乎元
尤足以建立人極也劉一止劉寧止兄與弟也然皆有
論列可傳劉述劉岑祖與孫也然皆有政績可紀爲葉
義問所薦者沈樞也而有君子小人之辨與丘宓爲師

者沈作賓也而有以寬濟嚴之節朱泰之脫於虎口孝之感也陳存之絕於醫粟忠之激也至於章鑄方宋之存而屢進謹言於上及宋之亡而不納誥勅於元此其節義尤彰彰可尚也牟應龍方宋之存而爵位讓之兄弟及宋之亡而經學講於父子此其文煒落落不凡也以元言之趙孟頫雖不能守節而工詩善書墨墨至今人傳誦之沈夢麟雖不能守節而著花溪集至今人寶藏之著易呂說者倪淵也著折桂集者宇文公諒也至於張復爲泰州同知之官與吳興八俊之列此又元之人物也若夫古之流寓於此者錢林自徐州而來以隱陂門不事王侯不干名利其高節超然不可亂也裴子野自河東而來以著宋略人成於手我成於心其爲文爽然不可刪也張志和本金華人也煙波釣叟之號取重於顏真卿玄真坊之名表章於觀察使太虛爲室明月爲燭此其爲人孤介如此也陸羽本復州人也筮易而知姓名有桑苧之號在唐而隱若溪有茶經之撰獨行則歌嘑意則哭此其爲人放達如此也陳舜俞來自嘉興論青苗而貶官何彥猷來自高唐救岳飛而罷職蔡洸知寧國而橐無餘資何廉如之牟子才爲御史而四壁蕭然何清如之至於敖繼公本福州人也邃通經術動遵禮法趙子昂事之如師高顯卿薦之於上儀禮集說雖已脫橐而信州教授未及蒞官此又流寓之人物如此也若夫我朝之人物又可言者張羽舉明經而授司訓詩文俊逸齊名高楊嚴重屢直以稅戶而授少叅聖學宏偉出使安

南溫祥卿潘長壽皆以人才而官于朝有好學之功聞
良輔柴震皆以大理而審于獄有繫身之操上治安十
疏者陳援也抄唐韻數過者楊復也凌晏如以楷書而
授黃門所奏侃侃有理張翼以進士而授僉憲所至赫
赫有聲大順以後人才間見不絕吾未可以悉數之也

嚴州府人物

田錫之論嚴州也曰當甌歙之衝范仲淹之論嚴州也
曰合衢歙之水錢勰謂之據浙上游晦翁謂之山川宏
偉其風土亦奇矣以其郡名言之漢曰嚴陵吳曰新都
而嚴州之名始于唐也說者謂是郡民和物阜民貧性
嗇然彬彬文學之士輝映於先後云請具陳之漢有方儲
精孟氏易而世傳其仙去不可信也吳有陳惲封餘杭

侯而世傳其仙術不可知也晉有夏孝先負土成墳而
子道爲不置梁有周文育窺敵制勝而將才為有餘至
於漢之嚴光自會稽而掛富春桐江一絲不足以助東
京風俗之美乎宋之戴顓自譙郡而居剡縣通選十篇
不足以擴列聖經書之旨乎若夫方儕方儼俱以學行
著戴逵戴勃並以高誼聞以唐人言之方干隱居釣臺
而有詩集今立廟於桐廬祀之矣李頰歷官刺史而有
詩傳今立廟於梨山祠之矣吳少微與富嘉謨同官辭
本經義成文體一變之功皇甫湜與李翱齊名才能不
羈與文體三變之列陳京何起獲旌其門非以親喪廬
墓耶祝希進戴元益獲旌其門非以和氣致祥耶施肩
吾舉進士而西出隱身則其識趣可知矣俞鳧舉進士而

詩文合律則其問學可想矣逮至于宋邵煥賦春雨之
詩頃刻立就何慧也胡嘉言論和議之非切直不避何
剛也極論時政江公望也不足以全司諫之節乎惟論
大計王縉也不足以得諫臣之體乎方臘之亂詹良臣
死之君臣之義篤矣徐亨死之兄弟之義厚矣金人之
亂劉晏死之官四子於宣和矣徐梅龜死之官一子於
嘉熙矣陸時雍分膳供母養生竭其力焉方慤父死廬
墓送死盡其禮焉方閔方閔皆方閔之兄弟也而閔之
在太學有兩浙三方天下無雙之號汪洋張孝祥皆喻
樗之女婿也而樗之登進士有四書解玉泉錄之書著
字經解易外傳者方逢辰也且其舉進士第一而權臣
以隱身不出豈非鴻冥鳳舉浩浩然全士夫之氣節

乎著易衍中庸等書者何夢桂也且其舉進士第三而
宋室滅亡隱身不仕豈非龍蟠虎伏凜凜然植萬古之
綱常乎復齋先生曰趙彥肅所著有易說非徒識其辭
占也融堂先生曰錢時所著有尚書衍義非徒曉其章
句也以天子之命官持宰相之奴僕胡朝穎之判嘉興
也剛心勁節使懦者立矣守官數十年而無室舉家三
百指而無田洪璞之仕鎮東也清風雅操使頑者廉矣
張拭守其郡呂祖謙教其庠時則有詹儀之也而學行
起人膾炙焉張栻銘其墓文公書其蓋時則有詹至也
而忠義襲人襟裾焉葉義問視師淮上而高宗書義問
到處如朕親行八字以賜之非徒賜之蓋有才可推轂
以遣也方有開著屯田詳議而朱文公書萬溪書堂以

號之非徒號之蓋有學可歛衽以敬也馬大同以謀畧而官戶部吾知生財有道矣黃蛻以文學而官大理吾知決獄無冤矣執法平允則有鄭穎號志齋歷官州郡則有邵應豹號菊逸人物清修則若汪自強詩文簡古則若方仲謀至於上彈文而激烈不肯阿意於權門觀黍離而潛逸不屑比面乎異姓此則豐稷之為人也以元言之余丙救父棺而遇暴雨之助有克享天心之誠徐舫荷簑笠而味耕雲之趣有若將終身之計著春秋集說者方道賢也著山居四要者汪汝懋也至於有魯淵者著策府樞要古今之事變畢陳撰春秋節傳褒貶之旨意殆盡至於我

朝周淵參藩政其淡薄之風羅觀總臬政守清慎之志

徐誼知鎮江有明有浙人莫能欺陳禮任豸綉有激有揚才莫能過聞質在工部以賢能見許於任曹洪璵在吏部以公廉見稱於僚宋天順以後人才某布不絕吾未得而殫數之也

金華府人物

金星與婺女爭華此是郡之所以名也名山以金華為最此是郡之所以盛也以其形勝考之其山有鐵巖石樓之秀拔赤石青臺之崢嶸其水有梅溪松溪之映帶銅川繡川之吞吐權德輿所謂山水之佳地而馮伉所謂江南之劇郡也故論風俗者曰君子尚禮人性敏慧然則風聲氣習豈不駸駸然隆古之盛哉請具陳之漢之時有顏烏負土成墳群鳥銜土而立義烏之號有駱

後厲武保鄉濟養百姓而卻袁術之兵楊喬有才貌而
桓帝欲妻以公主不食而死其節義足以充塞宇宙矣
楊璇舉孝廉而靈帝拜為零陵守賊不敢犯其謀畧足
以折衝樽俎矣三國之時留贊誅吳栢深有將帥之才
斯敦救斯備篤於父子之義逮至于晉朱汎守臨海而
有政声不愧朱雲之後也許孜舉孝廉而不應詔不愧
孝順之里也以南北朝言之朱幼婁幼瑜皆齊人也然
幼則刺楊州有功而有人安盜賊空之謠幼瑜則屢徵
辟不應而有拮拾摺遺記之撰龔孟舒鄭灼皆梁人也
然孟舒則明毛詩而堪師傅之位灼則明三禮而勤講
授之業逮至于唐厲文才刺道州臨郡期月盜賊悉平
其才畧可取矣而乃孫乾曜有祖風烈舒元輿遷中丞

按劾無縱牡丹賦詩其才智可稱矣而乃弟元肱有兄
矩度張志和親亡不仕自號玄真李德裕稱之曰隱而
有名顯而無事不窮不達嚴光之比非空言矣滕珣給
券還鄉不恋榮勢白居易送之曰身著錦衣兒戲繡東
陽門外數滕家非虛譽矣馮子華親沒廬墓陳太竭終
身衰麻均之為孝行之子也馮宿有惠政於東川楊扶
有奇政於交州均之循良之吏也駱賓王七歲賦詩而
名馳海宇故曰盧駱曰四傑至今並籍口實而有文集
可考焉馮定與兄同第而名播戎夷其曰馮審曰馮寬
當時並擢科第而有文學可推焉至於令諸暨而賊變
其橫令重泉而民悅其化非張敦乎以五代言之有劉
昭禹者撰詩三百篇句向夜深得何精思也心從天外

歸何汪洋也逮至于宋胡則典七州更六路節而民蒙
其政績王霆四登朝列七剖州符而功著于邊防治邊
凜然威行西北滕甫也而謚之為章敏信乎其章敏也
起兵勤王留守東京宗澤也而謚之為忠簡信乎其忠
簡也王師心敷歷中外咸著能績而弟師愈德望隱然
此之謂直兄弟也胡巖起卓行危論蕩平賴賊而子居
仁政事絕人此之謂真父子也賈庭佐劾王倫鄭剛中
忤秦檜而有北山集者則剛中也徐端益拒張邦昌應
孟明拒韓侂胄而有易文資者則端益也謚文肅者徐
邦憲舉進士第一而上䟽論權姦謚文毅者陳亮舉進
士第一而上書論恢復陳天隱事母至孝而以孝弟睦
嫺任恤忠和八字旌其門則大觀之時也徐文震數世

同爨而以金華孝友之家六字署其門則德祐之時也
喻良能著諸經講義邵困著讀易管見應鏞著禮記纂
義喬行簡著周禮總說此其才皆長于經徐次鐸作唐
書補注王象之作輿地紀勝章如愚作山堂考索何淡
作通鑑手抄此其才皆優于史呂祖謙號東萊先生其
著大事記固有以接道統之傳矣而其弟祖儉祖泰皆
上䟽論姦臣而不辭乎貶謫此不但一門之光而實萬
世之光矣馬之純號茂陵先生其學成行尊固足以廣
從游之教矣而厥孫光祖潤祖揚祖皆文學登進士而
有榮於奕葉此不但一家之瑞而實一代之瑞矣梅執
禮死於靖康李誠之死於嘉定項德 死於宣和此其
守死善道皆足以立吾儒之赤幟徐僑學於朱熹戚如

琥學於東萊何基學於黃幹此其篤信好學皆足以望
吾道之高門許直可許中許彥三世三進士吾所取者
以其操履皆有合乎範圍也唐堯封唐仲友唐仲義唐
仲溫兩世四進士吾所慕者以其文學皆有聲於翰墨
也稱香溪先生者范浚以心作箴理學不為之精暢乎
號冲素處士者鄭綺以身代父執道不為之懇到乎歐
陽為之序者徐無黨也而五代史注考訂無差有史學
矣黃潛為之跋者張潤之也而長山十詠鋪叙如描有
詩才矣剛毅不阿則若潘良貴為舍人也不曰賣直矣
彈劾不避則若王萬之為御史也不曰沽名矣李大同
為右正言而陳弭災之策喬夢符為大理正而慎鞠獄
之政善水利者錢適也而他行亦有可稱者熟兵務者

葉衡也而他藝亦有可嘉者樓炤為相而有襄靖之謚
後世亦信其襄靖焉王淮為相而有文定之謚後世亦
信其文定焉范鍾與杜範李宗勉齊名皆為宰相者也
雖無掀揭之動而伴食之相當退舍而避也金景文與
陳天隱董少舒齊名皆為縣令者也雖無卓異之名而
循吏之傳可半席而坐也號管齋者王柏求道之勇豈
口耳之習哉勤教授者汪淳學問之勵豈辭章之務哉
厲汪篤于教子而子模封開國侯足以慰過庭之訓矣
王介善於教子而子埜封吳郡侯足以紹箕裘之傳矣
作王氏叙傳者非王煥之乎作奏議雜著者非馬士仲
乎葛洪剛勁有為而能不負其志雜著者二十四卷誦之
者猶足以想見其挺然之操陳黻恬靜有守而能不改

其樂文集二十卷誦之者猶足以追思其淡然之心曹
冠上論恢復而決意於致仕何佹佹然正色哉陳良祐
力止開邊而其心於貶秩何凜凜然勁氣哉以元言之
金履祥號仁山講貫精篤而有通鑑前編焉蓋履祥之
學實得之於王柏也許謙號白雲素志冲澹而有四書
叢說焉蓋謙之學實得之於履祥也柳貫撰字系與虞
集黃潛揭傒斯齊名號之四傑誠不為過胡長孺撰瓦
缶編而與胡之綱胡之純齊名號之二胡良不為虛劉
應龜辭馬驥之婚何風采之嚴疑也吳直方贊脫脫之
議何謀畫之老成也著戰國策校註者吳師道也續後
漢書者張樞也黃潛之為文如澄湖不波一碧萬頃贈
之江夏郡公當其才矣鄭大和之治家如公府凜然三
代遺風謂之東浙第一家稱其情矣吳棻該貫古今而
謚為淵穎後世孰不信其有淵穎之實聞人夢吉深究
理義而謚疑熙當時孰不服其有疑熙之迹少從許謙
者朱震亨也而清修苦節有局方發揮等書實醫家之
矜式焉少從黃潛者戴良也而英偉秀發有孝和陶詩
等書實詩家之準繩焉逮至我

朝學士宋濂贊帝猷於開國之初巍然相業夷夏皆知
矣及觀其潛溪等集筆力雄麗吾謂蘇子瞻後一人也
待制王禕執使節於南夷之地浩然義氣日月可貫矣
及觀其華川等集志氣豪邁吾謂文天祥後一人也胡
翰蘇伯衡咸以文學重士林而擢清要之地鄭濂鄭沂
俱孝行藹門閭而授貴顯之階劉辰居侍御之垣正色

新編博物策會卷之十終
蹇諤而作邪者不敢長其奸邵玘總內臺之憲遇事善
斷而舞文者不敢售其計傅藻傳通經史而見用於憲
臣戴原禮精通醫術而受知於潛邸至於王紳遠求遺
骸號慟幾絕則其孝乃精孝也詩文冲澹有陶韋氣則
其學乃實學也天順以後人才林立未得而悉數之也

新編博物策會卷之十終

